



VINNUEFTIRLIT RÍKISINS

Ákvörðun nr. 13/2018
Reykjavík, 16. ágúst 2018

Ákvörðun um bann við markaðssetningu og notkun véla.

I. Málavextir

Í tölvubréfi frá Vinnueftirliti ríkisins til fyrirtækisins TripCampers ehf. kt. 670114-0820, dags. 12. apríl 2017, óskaði stofnunin eftir upplýsingum um hvort fyrirtækið hafi flutt inn eða keypt hitunarbúnað í ferðabíla, af tegundinni Air 2KW Parking Heater frá JP China Trade Int'l Co., LTD, og ef svo væri, fór stofnunin fram á að fá afrit af EB-samræmisyfirlýsingu búnaðarins. Með bréfi dags. 26. febrúar 2018, ítrekaði Vinnueftirlit ríkisins beiðni sína um EB-samræmisyfirlýsingu fyrir umræddan hitunarbúnað í ferðabíla. Engin gögn bárust frá fyrirtækinu.

Í eftirlitsferð Vinnueftirlits ríkisins, þann 12. júní 2018, til fyrirtækisins kvaðst einn eigandi þess vita af því að búnaður væri ekki í samræmi við reglugerð nr. 1005/2009 um vélar og tæknilegan búnað. Eigandinn kvaðst hafa verið með slíkan búnað í fimm bílum en fyrirtækið leigir út bíla með svefnaðstöðu. Eigandi fyrirtækisins kvaðst hafa fengið þær upplýsingar frá öðrum fyrirtækjum, sem voru með umræddan búnað í sínum bílum, að skipta þyrfti hitunarbúnaðinum út og væri hann nú þegar búinn að taka búnaðinn úr þremur bílum fyrirtækisins.

Með bréfi dags. 15. júní 2018 var fyrirtækinu veittur frestur til og með 6. júlí 2018 til að koma að andmælum, sbr. 13. gr. stjórnisýslulaga nr. 37/1993, eða koma umræddum hitunarbúnaði í samræmi við kröfur reglugerðar nr. 1005/2009 um vélar og tæknilegan búnað.

Vinnueftirlit ríkisins hefur ekki borist svar við bréfi stofnunarinnar, dags. 15. júní 2018. Þá hafa engin gögn borist varðandi umræddan hitunarbúnað.

II. Niðurstaða

Hitunarbúnaður í ferðabíla af tegundinni Air 2KW Parking Heater sem fyrirtækið keypti af aðila utan Evrópska efnahagssvæðisins (EES) og flutti inn til landsins fellur undir reglugerð nr.

1005/2009 um vélar og tæknilegan búnað. Fyrirtækið TripCampers ehf. telst framleiðandi vélarinnar í skilningi reglugerðarinnar, sbr. i. lið 2. gr., þar sem fyrirtækið flutti vélarnar sjálf inn til landsins.

Samkvæmt e-lið 1. mgr. 7. gr. reglugerðar nr. 1005/2009 um vélar og tæknilegan búnað skal framleiðandi, áður en vél er sett á markað og/eða tekin í notkun, semja EB-samræmisyfirlýsingu skv. A-lið 1. hluta II. viðauka reglugerðarinnar og tryggja að yfirlýsingin fylgi vélinni. Í A-lið 1. hluta II. viðauka við reglugerðarinnar eru tiltekin, í 10 töluliðum, þau atriði sem þurfa að koma fram í EB-samræmisyfirlýsingu fyrir vél.

Ákvæði 2. mgr. 15. gr. reglugerðar nr. 1005/2009 um vélar og tæknilegan búnað er svohljóðandi:

Komist Vinnueftirliti ríkisins að því að vél sem fellur undir gildissvið reglugerðar þessarar hafi ranglega verið einkennd með CE-merki, sbr. 13. gr., eða henni fylgir ranglega EB-samræmisyfirlýsing ber framleiðanda eða viðurkenndum fulltrúa hans að sjá til þess að vélinni verði breytt þannig að hún fullnægi ákvæðum reglugerðar þessarar um CE-merki og EB-samræmisyfirlýsingu.

Þá hljóðar 3. mgr. sömu greinar svo:

Sinni framleiðandi eða viðurkenndur fulltrúi hans ekki skyldu sinni skv. 2. mgr. eftir að hafa fengið hæfilegan frest til að bæta úr annmörkum skv. 1. mgr. er Vinnueftirliti ríkisins heimilt að banna markaðssetningu og/eða notkun vélarinnar eða setja sérstök skilyrði fyrir slíku. Að öðru leyti gildir 48. gr. a laga um aðbúnað, hollustuhætti og öryggi á vinnustöðum.

Framangreindur hitunarbúnaður í ferðabíla er ranglega viðurkenndur, skv. b. lið 1. mgr. 15. gr. reglugerðarinnar, þar sem EB-samræmisyfirlýsingu vantar fyrir vélarnar. Þá hefur fyrirtækið ekki komið vélunum í samræmi við kröfur reglugerðarinnar.

Samkvæmt 1. mgr. 48. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum, kemur fram að óheimilt sé að setja á markað eða taka í notkun tegund véla, tækja eða annars búnaðar sem uppfyllir ekki reglur um öryggi og formskilyrði, svo sem um merkingar, leiðbeiningar, vottanir, yfirlýsingar um samræmi eða prófunarskýrslur, sem sett eru skv. framangreindum lögum og sérreglum settum á grundvelli þeirra.

Samkvæmt 1. mgr. 48. gr. a laga nr. 46/1980 um aðbúnað, hollustuhætti og öryggi á vinnustöðum með síðari breytingum, er Vinnueftirliti ríkisins heimilt að banna markaðssetningu og notkun á þeim tegundum véla, tækja eða annars búnaðar sem fullnægja ekki ákvæðum laga þessara, annarra sérreglna sem settar eru á grundvelli þeirra eða viðurkenndra staðla er gilda á sameiginlegum markaði ríkja Evrópska efnahagssvæðisins.

Samkvæmt 5. mgr. 48. gr. a laga nr. 46/1980 um aðbúnað, hollustuhætti og öryggi á vinnustöðum, með síðari breytingum, kemur fram að torveldi atvinnurekandi, framleiðandi eða dreifingaraðili sannanlega rannsókn og skoðun Vinnueftirlits ríkisins á viðkomandi tegund eða hefur ekki tiltæk fullnægjandi gögn um öryggi hennar er stofnuninni heimilt að banna markaðssetningu og notkun hennar.

III.
Ákvörðunarorð

Með vísan til 1. mgr. 48. gr. a laga nr. 46/1980 um aðbúnað, hollustuhætti og öryggi á vinnustöðum, með síðari breytingum, sbr. 5. mgr. sömu greinar og 3. mgr. 15. gr. reglugerðar nr. 1005/2009 um vélar og tæknilegan búnað, bannar Vinnueftirlit ríkisins markaðssetningu og notkun hitunarbúnaðar í ferðabíla af tegundinni Air 2KW Parking Heater frá JP China Trade Int'l Co., LTD, sem fyrirtækið keypti af aðila utan Evrópska efnahagssvæðisins og flutti inn til landsins.

Vinnueftirlit ríkisins